

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB DATO' TAKIYUDDIN BIN HASSAN**  
**[KOTA BHARU]**  
**TARIKH : 25 MEI 2016**  
**SOALAN :**

**YB Dato' Takiyuddin bin Hassan [Kota Bharu] minta MENTERI KESIHATAN menyatakan bagaimanakah tahap kesihatan rakyat Malaysia berbanding dengan rakyat Negara-negara jiran.**

**Tuan Yang di-Pertua,**

Bagi membandingkan tahap kesihatan rakyat di antara negara-negara yang berlainan, beberapa indikator telah digunakan di peringkat antarabangsa seperti indikator-indikator yang menggambarkan jangka hayat (Life Expectancy) dan kematian (mortality) serta indikator-indikator yang menggambarkan risiko penyakit.

Berdasarkan World Health Statistics 2015 yang diterbitkan oleh Pertubuhan Kesihatan Sedunia (WHO), jangka hayat semasa lahir (Life Expectancy at birth) bagi rakyat Malaysia adalah 72 tahun bagi lelaki dan 76 tahun bagi wanita. Jangka hayat bagi lelaki di Malaysia adalah lebih tinggi berbanding negara-negara jiran kecuali Singapura dan Brunei. Bagi wanita, jangka hayat di Malaysia adalah lebih tinggi berbanding Indonesia dan Filipina tetapi lebih rendah berbanding Singapura, Thailand dan Brunei. Jangka hayat disertakan di maklumat tambahan.

Bagi indikator yang menggambarkan tahap kesihatan bayi dan kanak-kanak, berdasarkan World Health Statistics 2015, kadar kematian bayi dan kanak-kanak di Malaysia adalah lebih rendah berbanding negara-negara jiran kecuali Singapura. Statistik seperti di maklumat tambahan.

Bagi indikator yang menggambarkan tahap kesihatan ibu, di Malaysia, kadarnya kematian ibu adalah 29 bagi setiap 100 000 kelahiran hidup. Kadar ini adalah lebih rendah berbanding Indonesia dan Filipina dan lebih tinggi berbanding Singapura. Kadar kematian ibu di Thailand dan Brunei tidak banyak berbeza dengan kadar di Malaysia. Statistik adalah seperti di maklumat tambahan

Bagi indikator-indikator risiko penyakit tidak berjangkit, terdapat beberapa indikator yang boleh dibandingkan di antara negara-negara berdasarkan *age-standardized prevalence* menurut laporan World Health Statistics 2015.

Secara keseluruhan prevalen diabetes adalah lebih tinggi di Malaysia berbanding negara-negara jiran kecuali Brunei. Bagi hipertensi, prevalen di Malaysia adalah lebih tinggi berbanding Singapura, Thailand dan Brunei tetapi tidak banyak berbeza berbanding Indonesia dan Filipina. Bagi obesiti, selain Brunei, prevalen obesiti di Malaysia adalah lebih tinggi berbanding negara-negara jiran yang lain. Statistik disertakan di maklumat tambahan.

Bagi tabiat merokok, di kalangan lelaki, prevalen merokok adalah lebih rendah berbanding Indonesia dan Filipina tetapi lebih tinggi berbanding Singapura, Thailand dan Brunei. Prevalen merokok di kalangan wanita Malaysia adalah terendah berbanding dengan negara-negara jiran. Statistik disertakan di maklumat tambahan.